



18. februar 2016

Inatsisartut suleriaasianni § 33 naapertorlugu aaliangiiffigissassatut siunnersuut imaattoq matumuuna saqqummiuppara:

Inatsisartut aalajangiiffigissassaattut siunnersuut, tamatumuuna Naalackersuisut peqquneqassasut sulissutigissallugu, nunatsinni tusagassiuutini kalaallisut oqaatsitta atorluarneqarnerulernissaat.

(Inatsisartuni ilaasorta q Mimi Karlsen, Inuit Ataqatigiit)

Tunngavilersuut:

Matumuuna siunnersuut manna Inatsisartut UKA 15/106-i tunngavigalugu oqaluuserisassamik samminninnikuunnerannut tapitartuullugu saqqummiuppara.

Partiit tamarmiullutik oqaaseqaat imak nipilik ilalerpaat: *Inatsisartut pingaaruteqarluinnartutut isigivaat, kalaallisut oqaatsitta tusagassiuutit aqqutigalugit eqqortumik atorneqarnissaa.*

Tusagassiuutit nunani naqisimaneqanngitsumik ingerlatsiviuffiusuni pingaaruteqartorujussuupput. Demokrati tassaavoq innuttaasut kikkugalarunik, kalaallisut danskisulluunniit oqaaseqartuugunik, periarfissagissaartinneqarnissaat inuiaqatigiinni inuuffigisaminni sunniuteqaqataanissaminnut, aammalu kiffaanngissuseqarlutik oqaaserisatik atorlugit isummaminnik annissisinnaasariaqartut. Tamatuma nassatarivaa innuttaasut tamarmik oqaaserisatik toqqammavigalugit paasissutissinneqartarnissaminnik piginnaatitaanerak, ilisimatinneqassallutik inuiaqatigiit akornanni susoqarnerasoq, taamaasillutik paasimatik toqqammavigalugit isummersoqataasinnaanamut periarfissaqassallutik. Tamanna aamma ulluinnarni "naalagaaffimmi oqartussaaffiit sisamarisaatut" taaneqartarpoq, tassa tusagassiuutit naqisimaneqaratik saqqummiussisarsinnaanerak naqissusiivigissagaani.

Tusagassiuutit tassaapput tusarnaarissamat atuarnissamullu periarfissat pingaaruteqarnerpaat, tassami taakkua annertuumik sunniuteqarfimmassuk innuttaasut oqaatsiminnik atuilutik isummersoqataasinnaanerak. Tusagassiuutit oqaatsit eqqortumik atorneqarnissaat aamma pisussaaffigivaat.

Taamaattumik pingaaruteqartuuvoq tusagassiuutit kalaallisut oqaatsitsinnik eqqortumik atuisarissaat. Nunatsinni tusagassiuutit ingerlatsinerit danskisuummiit kalaallisuummut nutseriffiusorujussuupput, taamaattumillu aamma oqaatsitta eqqortumik atorneqarnissaat tusiapillattuusarluni. Ikinerussuteqartut oqaaserisaat danskit oqaasii, taamaattumik pissaanermik tigummiqartut oqaaserisaattut taaneqarsinnaavoq. Oqaatsit nutsikkat paasiuminaassinnaasarput, kukkuneqallattaasarput aammalu oqaaseqatigiiliorneri eqqarsaatigalugit kukkuneqallattaajuartarlutik.

Tusagassiuutit inuiaqatigiinnik sullitaminnut oqaatsinik atuinerminni maligassiuisuusappaat. Taamatut isumaqarpunga tusagassiuutit naqisimaneqanngitsumik isummersuuteqarsinnaatitaanerak illuatungilinngikkalarlugu. Kalaallisut oqaatsivut nunatsinni oqaatsini atorneqartuni pingaarnersappaat. Taamaattumillu pisussaaffigivarput oqaatsitta atorluarneratigut naapertuuttumik atorneqarnissaa anguniartuassallutigu. Atorluannikkut aamma oqaatsitta uummaarissuulluni ineriartortuarnissaa aqqutissiuuseqataaffigissavarput.

Oqaatsinik politikkeqarnitsinni taasumap ilusilersorneqarnerani kalaallisut oqaatsitta nukittorsaavigineqarnissaat ineriartortuarnissaalu pisussaaffigivarput, tassami amerlanerpaat inunnguuseralugu oqaaserivaat, allallu aappaattut oqaaseralugu. Tamatuma saniatigut

kalaallisut oqaatsigut nunatsinni pisortatigoortumik oqaaseraagut, aammalu tamaginni atugaralutigu.

Uanga isumaqarpunga nunatsinni tusagassiuutit kalaallisut oqaatsigut ataqqisariaqaraat, tamatumuuna Naalakkersuisut tusagassionermikkut ingerlatsisut pisussaaffilersinnaavaat namminersaminnik oqaatsit pillugit politikkeqarnissaminnut aammalu isummersorfigissagaat oqaatsitta tusagassiuutitigut atorneqarnerisa tutsuigineqarlunilu ineriartortitsiffiunissaa.

Oqaluuserisassap UKA 106/2015-p oqaluuserineqarneranin Naalakkersuisut ilisimatitsippat KNR-imit ilisimatinneqarsimallutik, siunnersortigineqartut atorluarlugit KNR-ip oqaatsit pillugit politikkerisassaa aammalu KNR-mi oqaatsinik atueriaatsit pillugit ineriartortitsinissallu qanoq politikkeqassanersut aamma KNR-ip innuttaasunik kiffartuussinissamut pisussaaffeqarnerminik naammassinninniarnissaa eqqarsaatigalugu.

Taamaattumik Naalakkersuisut tusagassiuutinut allanut piumasaqaatigisinnaavaa ingerlatsinerminni oqaatsinik politikkeqarnissaat eqqarsaatigalugu.

Uanga nammineerlunga Inatsisartut manna pillugu oqallinnissaat qilanaaraara, taamaasiornikkut Naalakkersuisut pisussaaffilerneqarsinnaammata kalaallisut oqaatsitta tusagassiuutitigut nukittorsaavigineqarnissaannik aqutissiuussiniarnerminni.

Ingerlatsinikkut aningaasatigullu pisortanut kingunerisinnaasai.

Pilersaarusiineq iliuseqaateqarnissarlu aningaasartuuteqarfiusussaassaaq. Taamaattorli naatsorsuutigineqartariaqarani tamatumunnga aningaasartuutit ukiumut AC-mut aningaasartuutaasartumut ataatsimit annertunerunissaa. Maannangaaq Ilinniartitaanermut, Kultureqarnermut, Ilageeqarnermut Ilisimatusarnermullu Naalakkersuisoqarfiup aningaasartuut pineqartoq isumagisinnaajumaaraa qularutigingilara.

Anigaasarsiornikkut ingerlatsinikkut suliffeqarnikkut namminersortunut kingunerisassai.

Soqanngilaq

Innuttaasunut anigaasarsiornikkut ingerlatsinikkullu kingunerisassai.

Soqanngilaq